

INUIT ATAQATIGIIT

Inatsisartuni



UKA 2018/43
04.11.18
Múte Bourup Egede

Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatsereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamut sulisuminnillu amerlisaanissamut aaqqissuussaannikkut aammalu inatsisitigut aporfissat suunerannik kingusinnerpaamik UKA2019-imi Naalakkersuisut saqqummiussinissaat pillugu Inatsisartunut aalajangiiffigisassatut siunnersuut. Aporfittut suussusersineqartut qanoq ililluni piujunnaartinnissaannut sapinngisamilluunniit aporfiit annikinnerpaamiitinnissaannut siunnersuummik nassuiaat imaqassaaq.

(Inatsisartunut ilaasortaq Aqqaluaq B. Egede, Inuit Ataqatigiit)

Nunatsinni aatsitassarsiornermi innuttaasut peqatigalugit inuussutissarsiutip ineriartortinnissaa avaqqunneqarsinnaangilaq. Peqataaneruniksummi aatsaat aatsitassarsiorneq iluamik aningaasarsiutigisinnaagatsigu.

Pisuussutigut uumaatsut inuiaqatigiit atugarissaarnerulernissatsinnut iluaqutissaraagut. Suliffissanik isertitanillu kiisalu ilisimasanik pilersitsiviusussat.

Pisuussutit uumaatsut inuussutissarsiornikkut inerisaaffiginiarnerini pingaarluinnarpoq nunatta innuttaanit avissaartuuffigineqaratik, avatangiisinut inuussutissarsiutinullu pioreersunut kalluaanngitsumik inerisaanissaaq. Avissaartuugatami immitsinnullu artukkerata nammassinnaasatsinnik ineriarisaavigisariaqarparput. Ataatsimoorfissaqarpugummi.

Nunatsinni ujaqqanik pinneraasiassanik nammineq inuussutissarsiuteqarsinnaanerput periarfissagissaarfigaarput. Nunaqqatitta pikkorissut tamanna uppernarsaatissaqartilereerpaat, sulilu inerisaanissamut sinaakkusiilluarnikkut, inuussutissarsiut nutaatut taasinnaasarput nunatta inuisalu aningaasarsiornikkut iluaqutigillualersinnaagaat Inuit Ataqatigiit upperilluinnarpaat.

Aatsitassarsiornerep inerisarnerani avataaniit annertuumik aningaasaliisussarsiorniluni ingerlaneq imminermini ajunngilaq. Nunamilli pisuussutaanillu piginnittuusut akuutinneqarnissaat pissarseqataanissaallu puigorneqassanngivippoq. Puigorneqassanngilarlu aamma aatsitassarsioriaatsit ilaat nammineerluta naqqaniit immitsinnullu aallaavigaluta inerisaavigilluarsinnaagigut; avammut niuerneramik nunamilu suliffinnik pilersitsiviusunik.

Avataaniit kikkugaluarnersut nunatsinni aatsitassarsiulernissaat kisiat utaqqiinnarnagu inerisaaniarta. Ukiuni kingullerni pinneraasiornikkut ilisimasatta niuerutiginninnittalu qaffassarneqarnerat neriulluarnartuusooq isumaqarpugut. Tassuunami takutipparput nammineq aamma saperata, aporfiillu periarfissanik taarserneqarpata, nunatta inui sikkilerumaartut kivitseqataaniarlutik. Pisortammi nunatsinni aporfilersuissanngillat, aqutissiuussillutilli siuariartornissatsinnut toqqammavissiissapput. Tamanna anersaaralugu siuarsaaniarta, nukiit pigereerpagut periarfissinniartigit.

Inuit Ataqtigii siunnersuuteqartoq, Inatsisartunut ilaasortaq Aqqaluaq Biilmann Egede qutsavigiumavaat, siunnersuummini nunatsinni pinnersaasiortortatta annikitsumillu aatsitassarsiortortatta maanna atugaannik nalilersuinissamik malitsigisaanillu pitsanngorsaanssamik qaqitaqarmat.

Pinnersaasiassanik nunaqqatitta nunattalu qanoq periarfissagissaartiginera uppersaatissaqartillualeriigarput sulii annertusaqqissinnaanera piviusorsiortuusoraarput.

Siuarsaanissamilu avaqunneqarsinnaanngilaq atuisuusut qanimut peqataatillugit suleqatigineqarnissaat. Taakkumi pinnersaasiassat sumiinnerinik, qanoq qallorneqarnissaanik, silineqarnissaanik niuerutigineqarnissaannillu ilaatigut misilittagaqarlualereermata. Suliaallu nunani tamalaani pitsaalluinnartutut nalilerneqartalereermata ilisimasaat nalitoqimmata tusaallugit sinaakkutit pitsaanerpaajunissaat qulakkeerniartigit. Naalackersuisullu kaammattorumavagut susassaqtut qanimut peqataatillugit sulinertik ingerlateqqullugu.

Manna iluatsillugu nunaqavissut aatsitassarsiorsinnaaneranut, pisortatigoortumik annikitsumik aatsitassarsionermik taaneqartartumut piffissami aggersumi immikkut inatsisiliornissaq Naalackersuisusunut aamma kaammattuutigiumavarput.

Taamak oqaaseqarluta siunnersuut taperserlugu ataatsimiitsitaliamut susassaqtumut innersuupparput.